

ԱՉԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒՅԹԻ ԵՒ ԱՐԱՐԱԿԱՆ ԾՈՑԻ ԵՐԿԻՐՆԵՐՈՒ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: q8church@yahoo.com

ՆՈՐ ՇՐՋԱՆ, 2. Տարի, Թիւ 220, Ուրբաթ, 28 ՓԵՏՐՈՒԱՐ, 2014

ՀԱՄԱՅՆՔԱՅԻՆ

Հարցազրոյց Սրբոց Վարդանանց Եկեղեցոյ Դրամահաւաքի Գործադիր Մարմինի Ատենապետ Պրն. Յակոբ Մելիքեթեանի Հետ

- 1) Աւելի քան մէկ ու կէս տարիներ Սրբոց Վարդանանց եկեղեցոյ դրամահաւաքի գործադիր մարմինը իր աշխատանքները որոշ չափով կատարեց, ձեր կարծիքով, որքանով կրցաք յաջողութիւն ձեռք ձգել:

Մենք որպէս գործադիր մարմին սկզբնական շրջանին համադրեցինք մեր ընդհանուր ծրագիրը, նախ սերտեցինք համայնքի կարողութիւնները եւ մեր ազգային վարչութեան մօտ պահ դրուած գումարը, ապա անցանք աշխատանքի: Որդեգրեցինք



մասնակցութեան սակի գաղափարը, որուն միջոցաւ իւրաքանչիւր անհատ կամ ընտանիք կրնայ մասնակցիլ իր փափաքին համաձայն, պայմանաւ՝ որ խոստանայ իր մասնակցութիւնը շարունակել երեք տարիներու ընթացքին: Այո, մենք չկրցանք հասնիլ 100% բոլորին, սակայն 65% ին հասանք ու անոնք մեծ մասամբ ընդառաջեցին մեզի:

- 2) Ի՞նչ է ձեր աշխատանքին հիմնական նպատակը:

Մենք հիմնական մէկ տեսլականով ճամբայ ելանք, որ ապահովել կոկիկ գումար մը, 300,000 քուէթեան տինարի սահամներուն մէջ, որպէսզի կարենանք բանակցութիւններ վարել կամ հողատիրոջ հետ համաձայնութիւն մը գոյացնել:

- 3) Ի՞նչ են ձեր ակնկալիքները յառաջիկային:

Մեր աշխատանքային թափը արդէն վերագտած ենք, միութիւններու օժանդակութեամբ, կը հաւատանք, գործը աւելի պիտի ընդարձակուի, նամանաւանդ ժողովուրդի մօտ տակաւին կայ այդ ջերմութիւնը, ինչու չէ նաեւ մտահոգութիւնը եկեղեցոյ ճակատագրի մասին: Յոյսով ենք նաեւ, որ մեր չհասած 35% ին ամբողջացումով եւ բոլորին կարգապահ մօտեցումով աւարտենք մեր աշխատանքը:

- 4) Ձեր աշխատանքներուն աւարտը ե՞րբ նախատեսած էք:

Մենք յատուկ թուական մը չենք նախատեսած մեր աշխատանքներուն համար: Մէկ ու կէս տարի առաջ մասնակցութեան սակի համար նախատեսած էինք 36 ամիսներ, սակայն այսօրուան տնտեսական լուրջ պայմանները, առաւել Միջին Արեւելքի եւ

յատկապես Սուրիոյ ճգնաժամը իրենց ծանր ազդեցութիւնը ունեցան մեր գործընթացին վրայ: Յոյսով ենք, մինչեւ 2016ի կիսուն ամբողջացնենք մեր աշխատանքները:

5) Այսօր ի՞նչ վիճակի մէջ է մարմինը եւ համայնքի մասնակցութիւնը որքանո՞վ գնահատելի է:

Ինչպէս յիշեցինք, որ համայնքը նաեւ ունի իր այլ դժուարութիւնները, ընդհանրապէս կեանքը դժուար ու ծանր ռիթմով կ'ընթանայ այս օրերուն: Հետեւաբար, իրապաշտ ըլլալու համար բարձր գնահատական չենք կրնար տալ մեր համայնքի զաւակներու մասնակցութեան մասին, բայց պատկարելի մասը արդէն տուած է իր խոստումը եւ կը կատարէ ճշդապահութեամբ:

6) Ձեր եզրափակիչ խօսքը:

Եզրափակիչ խօսքի համար կանուխ է: Մենք յոյսով ենք, ինչպէս Տիրոջ Աւետարանը կ'ըսէ.- «յոյսը ամօթով չի ձգեր», հետեւաբար խօսքս կ'ուղղեմ համայնքի բոլոր մեր հայորդիներուն, մեծ ու փոքրին, այր ու կնոջ, բժիշկին ու բանուորին, որ այսօր մեր առաջ դրուած հարցը էական է ու ճակատագրական: Դարերու ընթացքին մեր ազգային միջնաբերդը եղող հայ եկեղեցին, պէտք է պահպանել ամէն տեղ, նոյնիսկ եթէ աւազի վրայ կառուցուած ըլլայ, որովհետեւ եկեղեցին սոսկ քարապատ շէնք մը չէ, այլ մեր ժողովուրդը պատսպարող ու սնուցող պտղաբեր արգանդ:

Քուէթի Անկախութեան եւ Ազատագրման Զոյգ Տօներու Նշում Ազգային Վարժարանէն Ներս

Ուրբաթ, 24 Փետրուար 2014ին, Քուէթի Ազգային վարժարանէն ներս տեղի ունեցաւ աշակերտական մեծ տօնակատարութիւն մը Երկրի անկախութեան եւ ազատագրման տօներու առթիւ:

Աշակերտական կոկիկ յայտագրով վարժարանի ուսանողները իրենց ուրախութիւնը յայտնեցին եւ պատշաճ մասնակցութիւնը բերին սոյն տօնակատարութեան:



Աւարտին վարժարանի երկրորդական բաժնի պետական տեսչուհի՝ Տիկ. Ֆաթիմա Ալ Մուլլա խօսք առաւ եւ շնորհատրեց բոլոր ներկաները տօներու կապակցաբար, նաեւ շնորհակալութեան խօսք փոխանցեց բոլոր հայերուն, որոնք գտնուելով Քուէթի սահմաններէն ներս ճիգ ու ջանք չի խնայեցին երկիրը զարգացնելու եւ անոր ընկերային ու տնտեսական ոլորտներուն մէջ նորարարութիւն բերելու աշխատանքին մէջ:

Աշակերտները Քուէթի եւ Հայաստանի օրհներգները երգելով փակեցին տօնակատարութիւնը:

Սրբոց Վարդանանց Նահատակներու Յիշատակը Քուէջի Մէջ



Հայաստանեայց Առաքելական Սուրբ Եկեղեցին Մեծ Պահփին նախորդող Հինգշաբթի օրը կը նշէ Վարդանանց Ջորավարաց, հազար եւ երեսունվեց վկաներու (նահատակներու) յիշատակի օրը, որոնք նահատակուեցան մեծ պատերազմի ժամանակ: Իսկ անոր նախորդող Երեքշաբթի օրը Հայոց Եկեղեցին կը նշէ Ղեւոնդեանց տօնը (Ղեւոնդ Երեցի, Յովսէփ Հողոցմեցի Կաթողիկոսի եւ եւս եօթը հոգեւորականներու յիշատակութիւնը), որոնք

Աւարայրի ճակատամարտէն ետք տարուեցան Պարսկաստան եւ բազում չարչարանքներէ ետք նահատակուեցան, իրենց մասնակցութիւնը բերելով «վասն հաւատոյ եւ հայրենեաց» մղուած ճակատամարտին: Սուրբ Ղեւոնդեանց մարտիրոսութիւնը տեղի ունեցաւ Ս. Վարդանանց նահատակութենէն երեք տարի երկու ամիս ետք, բայց եկեղեցական տօնացոյցին մէջ առաջ դրուած է Ղեւոնդեանց տօնը՝ իբրեւ Վարդանանց Պատերազմի գաղափարախօս- նախապատրաստողներ:



Նշենք նաեւ, որ Վարդանանց տօնը չի նշուիր որպէս պատմական իրադարձութեան ոգեկոչում (որ բնորոշ է աշխարհիկ տօներուն), այլ կը նշուի որպէս սրբոց տօն: Հայաստանեայց Առաքելական Սուրբ Եկեղեցին Սրբոց Վարդանանց Տօնը կը նշէ Բուն Բարեկենդանին նախորդող Հինգշաբթի օրը: Եթէ այդ օրը կը համընկնի Փետրուար 14-ին նշուող Տեառնընդառաջի տօնին հետ, ապա Սրբոց Վարդանանց տօնը կը նշուի Բուն Բարեկենդանին նախորդող Երկուշաբթի օրը:



Ըստ Գայեանէ Անտոնեանի «Հայաստանեայց Առաքելական Սուրբ Եկեղեցու, Հայաստանի Հանրապետութեան պետական տօներ, յիշատակի օրեր» գիրքին՝ Հայաստանեայց Եկեղեցին Ս. Վարդանանց տօնը չի նշեր Աւարայրի ճակատամարտի օրը՝ Մայիս 26-ին, հաւանաբար այն պատճառով, որ Վրթանէս Ա. Կաթողիկոսի կողմէ 4-րդ դարուն հայոց տօնացոյցին մէջ արդէն հաստատուած էր ազգային նահատակներու տօնը՝ ի յիշատակ 337թ. Պարսից տէրութեան ներխուժման դէմ մղուող պատերազմին նահատակուած Հայոց սպարապետ Վաչէ

Մամիկոնեանի եւ անոր զինակիցներուն: Վաչէեաններու տօնը 5-րդ դարուն կը միաւորուի հայ ժողովուրդի քրիստոնէական ինքնութեան հաստատման եւ ազատութեան ձգտումի առաւել մեծ

հնչեղութիւն ունեցող յիշատակին՝ Վարդանանց պատերազմի նահատակներու տօնին, եւ կը հռչակուի Վարդանանց անունով, տօնի օրը մնալով անխախտ:

Հինգշաբթի, 20 Փետրուարին, Քուէյթի Սրբոց Վարդանանց Եկեղեցւոյ մէջ կատարուեցաւ Երեկոյեան Ժամերգութիւն եւ Նախատօնակ՝ ի յիշատակ Վարդանանց Զօրավարաց, Հազար եւ երեսուն վկաներուն, որոնք նահատակուեցան մեծ պատերազմի ժամանակ «վասն հաւատոյ եւ վասն հայրենեաց»: Այնուհետեւ տեղի ունեցաւ աղի օրհնութեան կարգ եւ մատաղացու ոչխարի զենում՝ Եկեղեցւոյ բակին մէջ: Իսկ Ուրբաթ, 21 Փետրուարին, սօնուեցաւ Եկեղեցւոյ ուխտի օրը: Քարոզի ընթացքին Քուէյթի եւ Շրջակայից Թեմի Կաթողիկոսական Փոխանորդ Գերպ. Տ. Մասիս Ծ. Վրդ. Զօպույեան վեր առաւ Վարդանանց Նահատակներու դերն ու նշանակութիւնը հայ ժողովուրդի ազգային եւ հոգեւոր կեանքին մէջ: Ան նշեց, որ այսօր եւս հայ ժողովուրդն ու եկեղեցին կը դիմագրաւեն բազում դժուարութիւններ, որոնց համար հարկ է նոր Վարդաններու գոյութիւնը: Յաւարտ Սուրբ եւ Անմահ Պատարագին, Եկեղեցւոյ բակին մէջ կատարուեցաւ Մատաղօրհնէք, որմէ ետք Եկեղեցւոյ Դպրաց Դասը երգեց Վարդանաշունչ երգեր: Այնուհետեւ տեղի ունեցաւ մատաղի բաշխում, որուն պատրաստութեան եւ բաշխման աշխատանքը վստահուած էր Եկեղեցւոյ Տիկնանց Յանձնախումբին:



Քուէյթի Ազգային Վարժարանի Տարեկան Աւանդական Քերմէս 2014ը

Քուէյթի հայ համայնքի զաւակներուն համար սովորութիւն դարձած է տարիներէ ի վեր Փետրուար ամսուան ընթացքին Քուէյթի ազգային տօնակատարութեանց իրենց մասնակցութիւն բերել վարժարանէն ներս, հոգաբարձութեան կազմակերպած Քերմէսով, ուր կը հաւաքուին աւելի քան 1000 հայորդիներ վայելելու համար համադամ



հայկական ճաշացուցակներ, հաճելի անակնկալներ ու հայ շունչով տոգորուած մթնոլորտ:

Այս տարի եւս վարժարանի Քերմէսը տեղի ունեցաւ դպրոցի բակէն ներս, 25-26 Փետրուարին ու պիտի շարունակուի 28ի երեկոյեան:

Վարձքը կատար բոլոր աշխատող նուիրեալներուն, որոնք իրենց գոհողութեամբ հայ դպրոցի ջախը միշտ վառ կը պահեն:

ՀԱՅԿԱԿԱՆ

**«Հայաստան – Եւրոպական Միութիւն
Յարաբերութիւններուն Մէջ Ոչինչ Փոխուած Է» Նշեց
Նախագահ Սարգսեան**



Հայաստանը կարելոր կը նկատէ դարաւոր բարեկամութեան ու պատմական առնչութիւններու վրայ հիմնուած հայ – յունական բազմաբնոյթ յարաբերութիւնները, որոնք բաւականաչափ ներուժ ունին, եւ ասիկա երկկողմանի ջանքերով անհրաժեշտ է ամրապնդել: Այդ մասին յայտարարեց նախագահ Սերժ Սարգսեան՝ Չորեքշաբթի օր ընդունելով պաշտօնական այցելութեամբ Երեւան գտնուող Յունաստանի խորհրդարանի նախագահ Վանկելիս Մէյմարաքիսը:

Յունաստանի խորհրդարանի նախագահը ընդգծեց, որ դարերու խորքէն եկող հայ եւ յուն ժողովուրդներու՝ ընդհանուր արժէքներու վրայ հիմնուած ամուր բարեկամութիւնը մեծ ապագայ ունի:

Զրուցակիցները կարելոր նկատեցին խորհրդարանական դիւանագիտութեան դերը երկկողմանի քաղաքական երկխօսութիւնը յառաջ մղելու գործին մէջ՝ դրական գնահատելով Հայաստանի եւ Յունաստանի խորհրդարաններուն մէջ ձեւաւորուած բարեկամութեան խումբերի գործունէութիւնը: Կողմերը շեշտեցին, որ օրէնսդիր մարմիններու միջեւ սերտ գործակցութիւնը կրնայ մեծապէս օգտակար դառնալ երկու երկիրներու կառավարութիւններուն միջեւ փոխադարձ շահաւէտ համագործակցութեան զարգացման ու խորացման գործին մէջ:

Հանդիպման ժամանակ անդրադարձ կատարուեցաւ նաեւ Հայաստան – Եւրոպական Միութիւն յարաբերութիւններուն: Խօսելով անոնց հեռանկարին մասին՝ նախագահ Սերժ Սարգսեան յայտնեց, որ այդ յարաբերութիւններուն մէջ ոչինչ փոխուած է. նախորդ տարուան նոյեմբերին Վիլնիւսի վեհաժողովին ընթացքին Հայաստան հաստատեց Եւրոպական Միութեան հետ սերտ համագործակցութիւն զարգացնելու յանձնառութիւնը: Նախանցեալ օր Հայաստանի Ազգային անվտանգութեան խորհուրդի նիստին հաւանութեան արժանացաւ «Եւրոպական դրացնութեան քաղաքականութեան Հայաստանի Հանրապետութիւն – Եւրոպական Միութիւն գործողութիւններու ծրագիրի կատարումը ապահովող 2014-2015 թուականներու նախաձեռնութիւններու ցանկի նախագիծը, եւ հետագայ գործակցութեան խորացման ուղղութեամբ միացեալ աշխատանքները կը շարունակուին:

Եւրոպական Միութեան ներկայիս նախագահող երկրին՝ Յունաստանի խորհրդարանի նախագահը վստահեցուց, որ իր երկիրը պիտի ընէ առաւելագոյնը՝ երկկողմանի կապերու ամրապնդումէն բացի, նպաստելու Հայաստան -Եւրոպական Միութիւն յարաբերութիւններու զարգացման:

Վանկելիս Մէյմարաքիս Չորեքշաբթի օր ընդունուեցաւ նաեւ Ազգային ժողովի նախագահ Յովիկ Աբրահամեանի եւ վարչապետ Տիգրան Սարգսեանի կողմէ, տեղի ունեցաւ նաեւ Յունաստանի խորհրդարանի նախագահին հետ Ազգային ժողովի Հայաստան – Յունաստան բարեկամական խումբի անդամներու հանդիպումը:

Չորեքշաբթի օր տեղի ունեցաւ նաեւ արտաքին գործոց նախարար Էդուարդ Նալբանդեանի եւ Յունաստանի խորհրդարանի նախագահին հանդիպումը:



Զրուցակիցները ջերմութեամբ վերլիշեցին նախորդ տարուան մարտին Աթէնքի մէջ ունեցած հանդիպումը եւ գոհունակութեամբ արձանագրեցին, որ երկու երկիրներու խորհրդարաններուն միջեւ հաստատուած է սերտ համագործակցութիւն, միջխորհրդարանական բարեկամութեան խումբերը աշխուժ գործունէութիւն կը ծաւալեն, ինչ որ մեծապէս կը նպաստէ միջպետական յարաբերութիւններու զարգացման եւ ժողովուրդներու միջեւ բարեկամութեան խորացման:

Յունաստանի խորհրդարանի ղեկավարն ու Հայաստանի արտաքին գործոց նախարարը նշեցին միջազգային կազմակերպութիւններուն խորհրդարանական վեհաժողովներուն երկու երկիրներու պատուիրակութիւններու համագործակցութեան սերտացման անհրաժեշտութիւնը:

Հանդիպման ընթացքին քննարկուեցան հայ-յունական բարեկամական յարաբերութիւններու հետագայ զարգացման ուղղութեամբ ձեռնարկուող քայլերը: Կարելոր նկատուեցաւ առեւտրական-տնտեսական համագործակցութեան խթանումը, ապակեղորոնացեալ փոխադարձ գործակցութիւնը:

Եւրոպական Միութեան մէջ Յունաստանի նախագահութեան ծիրին մէջ անդրադարձ կատարուեցաւ Հայաստան – Եւրոպական Միութիւն համագործակցութեան:

Կիպրական հիմնախնդիրի լուծման հոլովոյթին մէջ վերջերս արձանագրուած յառաջընթացի ծիրին մէջ Էվանկելիս Մէյմարաքիս ներկայացուց հիմնահարցին վերաբերեալ Յունաստանի մօտեցումները: Նախարար Նալբանդեան ներկայացուց դարաբաղեան տագնապի լուծման ուղղութեամբ Հայաստանի եւ միջազգային հանրութեան կողմէ գործադրուող ջանքերը:

Էդուարդ Նալբանդեան ու Էվանկելիս Մէյմարաքիս միտքեր փոխանակեցին շրջանային խնդիրներու եւ անոնց լուծման ուղիներուն վերաբերեալ:

«Մենք Մինչև Կերջ Պիտի Պաշտպանենք «Նայիրիտ»-ի Աշխատողներուն Շահերը» Կ'ըսէ Աղուան Վարդանեան

«Յստակ է, որ «Նայիրիտ»-ի վերաբերեալ «մութ» բառը չըսեմ, բայց բազմաթիւ պատմութիւններ կան, վարկերու, պարտքերու եւ արտերկրային ընկերութիւններու հետ կապուած, ուստի շատ հարցեր կը սպասեն իրենց պատասխաններուն», Չորեքշաբթի օր լրագրողներուն յայտնեց Հայաստանի Հանրապետութեան Ազգային Ժողովի ՀՅԴ խմբակցութեան պատգամաւոր Աղուան Վարդանեան:



Ըստ Վարդանեանի, «Նայիրիտ»-ի շուրջ բազմաթիւ ակնյայտ խնդիրներ կան, գորս առանց ուսումնասիրելու, առանց վեր հանելու կարելի չէ որոշել «Նայիրիտ»-ի հետագայ ճակատագիրը: Պատգամաւորը յայտնեց, որ նայիրիտցիները հիմա վատ վիճակի մէջ կը գտնուին, ստիպուած կ'ըլլան ժամանակ առ ժամանակ բողոքի ցոյցեր կազմակերպել: «Մենք չենք ընդունիր քաղաքական մեծամասնութեան փաստարկները: Այսօր իրանական ընկերութիւն մը «Նայիրիտ»-ի հարցով դատարան դիմած է, եւ այդ դատը տեղի պիտի ունենայ 10 մարտին: Կը կարծեմ, որ թերեւս այս քննարկումներէն ետք կառավարութիւնը ամէն ինչ կ'ընէ, որ «Նայիրիտ»-ը սնանկացման չտանին, որովհետեւ հակառակ պարագային, պիտի փակուի «Նայիրիտ»-ի բոլոր պատմութիւններու շղթան», ըսաւ Աղուան Վարդանեան՝ յոյս յայտնելով, որ այսպիսի հոլովոյթ տեղի չ'ունենար, որովհետեւ Հանրապետական կուսակցութիւնը խոստացած է յառաջիկային մանրամասն զբաղիլ «Նայիրիտ»-ի հարցով:

Աղուան Վարդանեան նշեց նաեւ, որ եթէ կարելի չեղաւ «Նայիրիտ»-ի հետ կապուած խնդիրները Ազգային Ժողովին մէջ կազմակերպել, ապա պիտի նախաձեռնեն հրապարակային քննարկումներ՝ հրաւիրելով այն անձերը, որոնք լաւատեղեակ են «Նայիրիտ»-ի խնդիրներուն, զանգուածային լրատուամիջոցները, որպէսզի փորձեն հասկնալ, թէ ի՛նչ կը կատարուի «Նայիրիտ»-ի շուրջ:

Պատասխանելով այն հարցումին, թէ արդեօք նայիրիտցիները պիտի սպասե՞ն մինչև աշուն, երբ այդ հարցը նորէն բարձրացուի, եթէ արդէն հիմա անոնք կը խօսին արտագաղթելու մասին, Աղուան Վարդանեան նշեց, որ թէեւ աշխատակիցները հիմա կը գտնուին ծանր վիճակի մէջ, բայց հարցը նաեւ կառավարութիւն-գործարան յարաբերութիւններուն մէջ է: «Մենք մինչև Կերջ պիտի պաշտպանենք աշխատողներու շահերը: Եւ երբ նախաձեռնենք հրապարակային քննարկումներ, անոնց պիտի մասնակցին նաեւ «Նայիրիտ»-ի աշխատակիցները, որովհետեւ անոնք կը տիրապետեն «Նայիրիտ»-ի շուրջ ստեղծուած պատմութիւններուն ամբողջ շղթային: Պէտք է տաք պահենք այս նիւթը, մինչև տեսնենք, թէ ո՛ր կը հասնինք», ըսաւ Աղուան Վարդանեան:

Հարաւային Տաքոթա Մերժած Է Ազրայէճանի Հովանաւորած Հակահայկական Բանաձէւը



Միացեալ Նահանգներու Հարաւային Տաքոթա նահանգի Ներկայացուցիչներու տունը մերժած է ազրայէճանցի լրպիիստներու ներկայացուցած հակահայկական թիւ 1020 բանաձէւը:

«Արմէնփրես» կը հաղորդէ, որ Քոնկրէսի աղբիւրները Միացեալ Նահանգներու արեւելեան շրջանի Հայ դատի յանձնախումբին յայտնած են, որ ընդլայնուած քննարկումներէն ետք՝ բանաձէւը ներկայացուցած քոնկրէսական Լանս Ռասըլ ստիպուած եղած է պաշտօնապէս զայն ետ վերցնել: «Ցաւալի է, որ բանաձէւը այսքան հեռու գացած է, սակայն դրական կողմը այն է, որ Հարաւային Տաքոթայի 105 օրէնսդիրներ ականջալուր եղան հալածուած հայ

քրիստոնէաներու վիճակին», ըսած է բանաձէւին դէմ արտայայտուած քոնկրէսական Մթի Հիթլէ:

Միացեալ Նահանգներու արեւելեան շրջանի Հայ դատի յանձնախումբի գործադիր տնօրէն Էլըն Ասատրեան նշած է. «Մենք խորապէս երախտապարտ ենք, որ Միացեալ Նահանգներու եւս մէկ նահանգի ընտրուած ղեկավարները ընդդիմացան քարիւղով հարուստ եւ փտած Ազրայէճանի նախագահի ջանքերուն՝ իր հայատեաց արշաւը տարածելու Ամերիկայի սրտին մէջ»:

Թիւ 1020 բանաձէւը յառաջ մղուած էր Իլիամ Ալիէի կողմէ՝ միջամտելու Հարաւային Տաքոթայի ժողովրդավարական համակարգին: Անիկա կը վերաբերէր Խոջալուի դէպքերուն եւ Ներկայացուցիչներու տուն ներկայացուած էր 21 փետրուարին:

Միացեալ Նահանգներու Հայ դատի յանձնախումբը նախագգուշական միջոցներու ձեռնարկած էր հակազդելու Ազրայէճանի եւ խոչընդոտելու բանաձէւի որդեգրումը: Յանձնախումբը կոչով դիմած էր Հարաւային Տաքոթայի քաղաքացիներուն, որպէսզի վերջիններս կապուին իրենց Ներկայացուցիչներու տան ղեկավարներուն եւ ներկայացուցիչներուն հետ՝ յորդորելով դէմ քուէարկել բանաձէւին:

Յունաստանի Խորհրդարանի Նախագահը Օիժեռնակաբերդի Մէջ Յարգեց Ցեղասպանութեան Զոհերուն Յիշատակը

Հայաստանի Ազգային ժողովի նախագահ Յովիկ Աբրահամեանի հրաւերով Հայաստան պաշտօնական այցելութիւն տուող Յունաստանի խորհրդարանի նախագահ Էվանկելոս Մէյմարաքիսի գլխաւորած պատուիրակութիւնը 25 փետրուարին այցելեց Օիժեռնակաբերդ: Հայաստանի Ազգային ժողովի փոխնախագահ Էդուարդ Շարմազանովի ընկերակցութեամբ Էվանկելոս Մէյմարաքիս ծաղկեպսակ զետեղեց Մեծ եղեռնի զոհերու յուշարձանին առջէ:

ՀՅ Դաշնակցութիւնը Չօրաւոր Կերպով Պաշտպանեց «Նայիրիտ» Գործարանին Հարցով Ժամանակաւոր Յանձնախումբ Ստեղծելու Գաղափարը

Չորեքշաբթի օր Հայաստանի Հանրապետութեան Ազգային ժողովի նիստին արտակարգօրէն քննարկուեցաւ ՀՅ Դաշնակցութեան ներկայացուցած՝ «Նայիրիտ գործարան» փակ բաժնետիրական ընկերութեան մասնաւորեցման, ստանձնած վարկային պարտաւորութիւններուն եւ անհրաժեշտ ծաւալով տնտեսական գործունէութիւն չիրականացնելու պատճառները ուսումնասիրելու Հայաստանի Հանրապետութեան Ազգային ժողովի ժամանակաւոր յանձնախումբ ստեղծելու նախագիծը:

Հիմնական զեկուցող, Ազգային ժողովի ՀՅԴ խմբակցութեան պատգամաւոր Արծուիկ Մինասեան նշեց, որ «Նայիրիտ» գործարանի գործունէութեան վերաբերեալ բազմաթիւ խնդիրներ յառաջացած են եւ գործարանը դադրեցուցած է իր գործունէութիւնը:

Պատգամաւորը յայտնեց, որ խնդիրին վերաբերեալ բազմաթիւ հրապարակումներ կը խօսին այն մասին, որ գործարանը կանխամտածուած դէպի սնանկացում կը տանին, ինչ որ Հայաստանի տնտեսութեան դէմ ուղղուած մարտահրաւեր է: «Որո՞նք են եւ ի՞նչ ձեւով ազդած են այս գործարանի գործունէութեան վրայ: Որեւէ ձեւով կարելի չէ պարզել, որովհետեւ այս հարցով քրէական գործերը մերժուած են եւ մութ պատմութիւններ մնացած են, իսկ գործարանը կուտակած է պարտքեր եւ 3000 աշխատակիցներ ալ անգործ մնացած են», ըսաւ պատգամաւորը:

Ան նշեց, որ «Նայիրիտ»-ի ապագան եւ ճակատագիր որոշելը պէտք է դառնայ Ազգային ժողովի կարելոր խնդիրներէն մէկը, որովհետեւ անիկա պէտք է ունենայ մասնակցութիւն այս խնդիրները բացայայտելու գործին մէջ: Դաշնակցական պատգամաւորը նշեց, որ կառավարութիւնը չի կրնար պատասխանել պարզ այն հարցումին, թէ ի՞նչ կը նախատեսուի «Նայիրիտ»-ի համար, արդե՞օք գործարանը պիտի վերագործարկուի: «Պատասխան չկայ: Մենք նաեւ կը տեսնենք տեղեկատուական կեդժ գրոհ գործարանին վերաբերեալ, իբրեւ թէ «Նայիրիտ»-ի հարցով մտահոգուած որոշ պաշտօնատարներ ջանք կը թափեն, որ գործարանը վերագործարկուի, սակայն այդ նոյն անձերն են «Նայիրիտ»-ի այսօրուան վիճակի մեղաւորները», ըսաւ Մինասեան՝ աւելցնելով, որ հոլովոյթները կը տանին դէպի կանխամտածուած սնանկացում, ինչ որ կը նշանակէ, որ գործարանի վերագործարկման կամ փրկութեան համար հիմքեր չկան:

Պատգամաւորը շեշտեց, որ շատ կարելոր է այս հարցերու լուծման ուղղութեամբ ժամանակաւոր յանձնախումբի ստեղծումը: Ազգային ժողովի տնտեսական հարցերու մնայուն յանձնախումբի նախագահ Վարդան Այվազեան նշեց, որ շարք մը նկատառումներէ մեկնելով, յանձնախումբը Դաշնակցութեան ներկայացուցած հարցադրման բացասական պատասխան տուաւ:

Ան նշեց, որ իր կարծիքով, կայ Դաշնակցութեան կողմէ քաղաքական շահարկման վտանգ, հակառակ պարագային՝ եթէ կայ կանխամտածուած սնանկացման կամ թալանի հոլովոյթ, ապա ինչ՞ ու Դաշնակցութիւնը չէ դիմած իրաւապահ մարմիններուն:

Ազգային ժողովի ՀՅԴ խմբակցության քարտուղար Ադուան Վարդանեան նշեց, որ Ազգային ժողովի նախագահին ելոյթը յոյս ներշնչեց, որ քաղաքական մեծամասնությունը կը ցանկայ հարցեր լուծել, բայց վերջին կէս ժամուան ընթացքին միանգամայն հակառակ պատկերը պարզուեցաւ:

Վարդանեան շեշտեց, որ Դաշնակցության խմբակցությունը քաղաքական շահարկում ընողը չէ, այլ իր նպատակը կը վերաբերի գործարանի վերագործարկման:

Ան նշեց, որ «Նայիրիտ»-ի գոյութեան բոլոր տարիները շղթայակապ պատմութիւն մըն է՝ արտերկրի մէջ տնտեսական գայթակղութիւններու, պարտքերու եւ վարկերու, զորս քաղաքական մեծամասնութիւն չ'ուզեր տեսնել: Ան ներկայացուց «Նայիրիտ»-ի վերաբերեալ բոլոր այն անօրինական փաստերը, որոնք այսօր ուսումնասիրման կարիքը ունին:

«Այսօր իրանական ընկերութիւն մը մտած է դատարան՝ պահանջելով, որ «Նայիրիտ» սնանկ յայտարարուի: Եւ եթէ սնանկ յայտարարուի, մոռցէք բոլոր պատմութիւնները: Ժամանակաւոր յանձնախումբ ստեղծելը միայն օգուտ պիտի բերէ գործին, ես ասիկա կ'երաշխաւորեմ», ըսաւ Ադուան Վարդանեան:

Ազգային ժողովի ՀՅԴ խմբակցության ղեկավար Արմէն Ռուստամեան իր կարգին նշեց, որ ստեղծուած է հետաքրքրական իրավիճակ, երբ քաղաքական մեծամասնությունը կ'առաջարկէ միասին աշխատիլ, այդ ընթացքին հարցեր ուսումնասիրել, իսկ յետոյ չ'ուզեր:



«Մենք կ'ըսենք՝ լաւ բան կ'ընենք, չէ՞ք հաւատար, եկէք աշխատինք եւ աշխատանքով ցոյց տանք: Ինչ տրամաբանութեամբ կը մերժէք: Եթէ որեւէ մէկուն կը թուի, որ «Նայիրիտ»-ի հարցը կարելորութիւն չունի, մենք կրնանք բազմաթիւ փաստեր ներկայացնել, թէ որքան կարելոր է ասիկա», ըսաւ Արմէն Ռուստամեան:

Ան նշեց, որ Վարդան Այվազեան կը մերժէ յանձնախումբ ստեղծելու առաջարկը, որովհետեւ Դաշնակցությունը չէ դիմած իրաւապահ մարմիններուն, եթէ ունին ուսումնասիրութիւններ, բայց յանձնախումբը, ըստ Ռուստամեանի, կը ստեղծուի այդ ուսումնասիրութիւնները ուսումնասիրելու համար:

«Նայիրիտ»-ի ԱշխատակիցներուՑոյց՝ Խորհրդարանին Առջեւ

«Նայիրիտ»-ի խումբ մը աշխատակիցներ Ազգային ժողովին դիմաց բողոքի ցոյց կատարեցին՝ պահանջելով, որ Ազգային ժողովը հաստատէ ՀՅԴ խմբակցության ներկայացուցած նախագիծը, որով կ'առաջարկուի ժամանակաւոր յանձնախումբ ստեղծել «Նայիրիտ»-ի բոլոր խնդիրները ուսումնասիրելու նպատակով: ՀՅԴ «Նիկոլ Աղբալեան» ուսանողական միությունը նաեւ միացաւ «Նայիրիտ»-ի աշխատակիցներուն՝ յայտարարելով, որ իրենք եկած են արդարութիւն պահանջելու «Նայիրիտ»-ի աշխատակիցներուն համար: Ուսանողական միութեան ատենապետ Գերասիմ Վարդանեան նաեւ ցուցարարներուն կոչ ուղղեց սպասելու մինչեւ Ազգային ժողովի նիստին աւարտը, քանի որ նիստէն ետք իրենց պիտի մօտենան սատարող պատգամաւորները:

Տիգրանակերտի Քաղաքապետարանի Ցուցանակին Վրայ Հայերեն



Թրքական «Միլլիյեթ» օրաթերթը կը հաղորդէ, որ Տիգրանակերտի Սուրի քաղաքապետարանի մուտքին զետեղուած է չորս լեզուներով ցուցանակ մը, որուն վրայ քրտերէն, թրքերէն, հայերէն եւ ասորերէն գրուած է «Սուրի քաղաքապետարան»: Սուրի փոխքաղաքապետ, քրտական Խաղաղութիւն եւ Ժողովրդավարութիւն կուսակցութեան անդամ Նաքշի Սայար ցուցանակի տեղադրման կապակցութեամբ յայտարարած է, որ ատիկա աննախադէպ իրադարձութիւն է, եւ Թուրքիոյ մէջ երբեք

այդպիսի բան չէ եղած: Ըստ անոր, քաղաքապետարանին մէջ սրտանց կ'ուզէին, որ ցուցանակը գրուած ըլլար նաեւ շրջանին մէջ գոյութիւն ունեցող այլ լեզուներով՝ ատիկա որակելով իբրեւ երախտագիտութեան դրսետորում:

Փոխքաղաքապետը ցուցանակը զետեղելու փաստը կապած է իսլամութեան հետ՝ ըսելով. «Ես իսլամական ինքնութիւն ունեցող եմ. կախելով այս բազմալեզու ցուցանակը՝ կը կատարեմ իսլամութեան առջեւ իմ պարտականութիւնս: Տիեզերքն ալ, լեզուներն ալ Աստուած ստեղծած է: Կ'ուզեմ կոչ ուղղել իսլամական շրջանակներուն՝ ուր ալ ըլլաք, ինչ պաշտօն ու ուժ ալ ունենաք, յարգեցէ՛ք լեզուները: Զանոնք Աստուած ստեղծած է»: Յիշեցնենք, որ Սուրի քաղաքապետ Ապտուլլահ Տեմիրպաշի նախաձեռնութեամբ Սուր մտնող ճամբուն վրայ գրուած է «Բարո՛վ եկաք», իսկ «Տիարպեքիր» զրօսաշրջական ուղեցոյցը թարգմանուած է հայերէնի:



ԱՆԴՐԱԴԱՐՁ

ՂԵՆՈՆՂԵԱՆՔ

Յովսեփ կաթողիկոս, Սահակ եւ Թաթիկ եպիսկոպոսներ, Ղեւոնդ, Սուշէ, Արշէն, Սամուէլ, Աբրահամ, Խորէն քահանաներ, Քաջաջ եւ Աբրահամ սարկաւազներ: Այս եւ այլ հոգեւորականներ Ղեւոնդեանց անուան տակ կը ճանչցուին:

Պարսից Յազկերտ Բ. թագաւորը, Վարդանանց պատերազմէն ետք, Հայաստանի մէջ ապստամբական նոր խլրտումներ կանխարգիլելու համար, կարգ մը կասկածելի նախարարներու հետ հոգեւորականներն ալ արգելափակեց:

454-ի Քուշանաց դէմ պատերազմի պարտութենէն ետք, Յազկերտ թագաւորը արգելափակուածներէն իւրաքանչիւրը տարբեր ձեւով սպաննեց: Անոնցմէ խումբ մը հոգեւորականներ, որոնք միասին նահատակուեան քաղաքէն դուրս վայրի մը մէջ, թաղուեցան հաւաքաբար:

Ժամանակ մը ետք, Խուժիկ անունով պարսիկ վաճառական մը անոնց թաղուած ոսկորները Նիւշապուի քաղաքը տարաւ եւ տուաւ Արշաւիր Կամսարականին, որուն պատմեց նաեւ անոնց նահատակութեան մանրամասնութիւնները:

Ղեւոնդեանք հայ եկեղեցականութեան պարծանք ներշնչող սուրբերն են: Իրենց վրայ կ'անձնաւորուի հայրենիքի եւ հաւատքի նկատմամբ նուիրումի գաղափարը:

Գրեթէ բոլորն ալ դաստիարակուած էին Սահակ-Մեսրոպեան դպրոցին մէջ: Ղեւոնդեանց քահանայից տօնը կը տօնուի Վարդանանց տօնի նախորդող Երեքշաբթի օրը, որ տօնն է նաեւ բոլոր քահանաներուն:

Յովհաննէս Սրկ. Մերօրեան

ՅԱՅՏԱՐԱՐՈՒԹԻՒՆ

*Փետրուար ամսուան մումի բարերաւութիւն՝
Քահքէճեան ընտանիք, ի յիշատակ իրենց հօր*

Ճորճ Քահքէճեան_ի

հոգւոյն

ՄԻՋԱԶԳԱՅԻՆ

Բախում՝ Խրիմի խորհրդարանի Շենքին Սօս

Gazeta.ru կը հաղորդէ, որ Խրիմի խորհրդարանի շենքին մօտ Ուքրանիոյ նոր իշխանութիւններու քանի մը հարիւր հակառակորդներու եւ առնուազն երկու հազար թաթարներու միջեւ բախում տեղի ունեցած է: «ՌԻԱ Նովոսթի» կը հաղորդէ, որ Ուքրանիոյ նոր իշխանութիւններուն հակառակորդները երեքշաբթի օրուրնէ ի վեր Խրիմի խորհրդարանին մօտ անժամկետ ցոյց կը կատարէին՝ Խրիմի ղեկավարութենէն պահանջելով չճանչնալ Ուքրանիոյ նոր իշխանութիւնները:

«Պի.Պի.Սի.» հաղորդեց, որ թաթարները «փառք Ուքրանիոյ» բացագանչած են, իսկ ռուսամէտները «Ռուսիա» պատասխանած են:

Ուքրանիոյ նախկին նախագահներ Լէոնիտ Քրաւչուք, Լէոնիտ Քուչմա եւ Վիքթոր Եուշչենքօ Չորեքշաբթի օր միացեալ յայտարարութիւն մը հրապարակելով դատապարտեցին խրիմեան քաղաքականութեան մէջ Ռուսիոյ միջամտութիւնը:

Փութին Ռուսիոյ Զօրքերու Մարտական Պատրաստուածութիւնը Ստուգել Հրամայած Է

«Ինթըրֆաքս» կը հաղորդէ, որ Ռուսիոյ նախագահ Վլատիմիր Փութին Չորեքշաբթի օր երկրի պաշտպանութեան նախարարութեան հրամայած է արեւմտեան եւ կեդրոնական Ռուսիոյ զինուորական շրջաններու զօրքերու, ինչպէս նաեւ քանի մը մարտական միաւորներու մարտական պատրաստուածութեան համապարփակ ստուգում կատարել:

Ռուսիոյ պաշտպանութեան նախարար Սերկէյ Շոյկու ըսած է. «Ռուսիոյ նախագահին կարգադրութեան համաձայն, այսօր ժամը 14:00-ին անսպասելիօրէն յայտարարուած տագնապի իբրեւ արդիւնք պատրաստ վիճակի բերուած են արեւմտեան զինուորական շրջանի զօրքերը, ինչպէս նաեւ միաւորներն ու ռազմակայանները, որոնք տեղակայուած են այդ տարածքին մէջ, կեդրոնական զինուորական շրջանի 2-րդ զօրքը, օդատիեզերական պաշտպանութեան, անկարգելաւոր զօրքերու, հեռաւոր ու զինուորական փոխադրութեան օդուժի հրամանատարութիւնները»:

Ստուգումը պիտի կատարուի 26 փետրուարէն 3 մարտ:

Ռուսիոյ արտաքին գործոց նախարար Սերկէյ Լաւրով Չորեքշաբթի օր ԵԱՀԿ-ին կոչ ուղղեց դատապարտելու արեւմտեան Ուքրանիոյ մէջ «ազգայնական եւ նոր ֆաշական» զգացումը եւ «ռուսերէնը արգիլելու, ռուսախօս բնակչութիւնը «ոչ քաղաքացիի» վերածելու եւ խօսքի ազատութիւնը սահմանափակելու կոչերը»:

Միւս կողմէ, Ուքրանիոյ ժամանակաւոր նախագահ Օլէքսանտր Թուրչինով յայտարարեց, որ զինեալ ուժերու գերագոյն հրամանատարի պարտականութիւնները կը ստանձնէ:

Ուքրանիոյ ներքին գործոց նախարարի պաշտօնակատար Արսէն Աւագով յայտնեց, որ ոստիկանական «Պերքուր» մասնայատուկ ուժերը, որոնք ցուցարարներու մահուան համար կը մեղադրուին, լուծարուած են:

Սեպատեմբերի նոր դեկավար Ալեքսէյ Չալին «Պերքուր» մասնայատուկ ուժերու անդամները հրաւիրեց իր քաղաքը՝ խոստանալով աշխատավարձ վճարել եւ ապահովել անոնց եւ անոնց ընտանիքներուն անվտանգութիւնը:



«Այդ մարդիկը արժանապատիւ կերպով կատարած են իրենց երկրին առջեւ պարտաւորութիւնը, տղամարդու կեցուածք ունեցած են, իսկ այժմ յօշոտման նետուած են կատղած նացիներու առջեւ՝ իրենց իսկ նախկին ղեկավարներուն կողմէ», ըսած է ան:

Միւս կողմէ, ըստ ուքրանական «քորրեսփոնտընթ» կայքին վրայ կատարուած հարցախոյզին արդիւնքներուն, հարցախոյզի մասնակիցներուն 18.6 առ հարիւրին կարծիքով Ուքրանիոյ նախագահ պիտի դառնայ «ՌԻԴԱՌ» կուսակցութեան ղեկավար, աշխարհահռչակ բոնցքամարտիկ Վիթալի Բլիշչոն, երկրորդ դիրքի վրայ է նախկին վարչապետ Եուլիա Թիմոշենքոն՝ 12.1 առ հարիւրով, իսկ երրորդ դիրքի վրայ է Շրջաններու կուսակցութենէն Սերկէյ Թիկիվիքոն՝ 10.7 առ հարիւրով:

Չորեքշաբթի օր գիշեր Ուքրանիոյ նոր կառավարութիւնը ներկայացուեցաւ Քիեւի Մայտան հրապարակին վրայ հաւաքուած ցուցարարներուն: Արսէնի Եացենիուք վարչապետի թեկնածու առաջադրուեցաւ: Խորհրդարանին մէջ Մայտանի շարք մը գործիչներէ կազմուած նախարարաց խորհուրդին շուրջ այսօր վստահութեան քուէարկութիւն տեղի պիտի ունենայ:

Ռուսիանի Ալիեր Հրաւիրած է Իրան



ԱՓԱ կը հաղորդէ, որ Ազրպէյճանի մէջ Իրանի դեսպան Սոհուն Փաք Ային երեքշաբթի օր հանդիպում ունեցած է Ազրպէյճանի նախագահ Իլհամ Ալիեւի հետ: Դեսպանատունէն ԱՓԱ-ին յայտնած են, որ դեսպանը Ալիեւին փոխանցած է Իրանի նախագահ Հասան Ռուհանիի՝ Իրան այցելելու հրաւերը:

Ալիեւ ընդունած է Իրանի նախագահին հրաւերը եւ աւելցուցած, որ Զուլիգերիոյ Տաւոս քաղաքին մէջ Իրանի նախագահին հետ իր ունեցած հանդիպումէն ետք, երկու երկիրներուն միջեւ յարաբերութիւններուն մէջ նոր փուլ սկսած է:

Ալիեւ ընդգծած է, որ Ազրպէյճան պատրաստ է Իրանի հետ բոլոր մարզերուն մէջ համագործակցութեան:

ԼՈՒՐԵՐ ԳԱՂՈՒԹՆԵՐԷՆ

Քանատա

Հանդիպում Լաւալի Քաղաքապետին Հետ



Փետրուար 7-ին, ՀՅԴ «Ս. Զեյթեան» կոմիտեի ներկայացուցիչները, ընկերակցութեամբ Լաւալի Հայ դատի յանձնախումբի անդամներուն, Լաւալի քաղաքապետարանին մէջ հանդիպում ունեցան Լաւալի նորընտիր քաղաքապետ Մարք Տըմերսի հետ: Հայկական պատուիրակութիւնը շնորհաւորեց Տեմերսը քաղաքապետի իր պաշտօնը ստանձնելուն առիթով:

Քաղաքապետ Մարք Տըմերս եւ Լաւալի քաղաքապետութեան գործադիր մարմինի անդամները սիրալիր ընդունելութիւն մը ցուցաբերեցին եւ քաղաքապետը տրամադրութիւն յայտնեց գործակցելու հայ գաղութին հետ:

Այս այցելութեան առիթով, Լաւալի Հայ կեդրոնի անունով յուշանուէր մը տրուեցաւ քաղաքապետին, ինչպէս նաեւ անոր յանձնուեցաւ թղթածրար մը, ուր ամփոփ ձեւով կը ներկայացուի Լաւալի հայութեան պատմականը:

Քաղաքապետ Մարք Տըմերս մեծ գոհունակութիւն յայտնեց եւ խոստացաւ անպայման այցելել Լաւալի Հայ կեդրոն՝ մօտէն ծանօթանալու Լաւալի հայ գաղութին:

Պերլին

Սումկայիթի, Պաքուի Եւ Գանձակի Ջարդերու Զոհերու Հոգեհանգստեան Արարողութիւն

Փետրուար 16-ին, Պերլինի Ս. Լուիզէ եկեղեցոյ մէջ տեղի ունեցաւ հոգեհանգստեան արարողութիւն՝ Սումկայիթի, Պաքուի եւ Գանձակի ջարդերու հայ զոհերու, ինչպէս նաեւ ազրպէյճանցի մարդասպանին կողմէ կացնահարուած երիտասարդ սպայ Գուրգէն Մարգարեանի յիշատակին:

Եկեղեցական արարողութեան աւարտէն ետք Պերլինի հայ համայնքի ներկայացուցիչներ հաւաքուեցան Հայ եկեղեցական եւ մշակութային միութեան ակումբին մէջ:

Գերմանիոյ մէջ Հայաստանի Հանրապետութեան դեսպան Վահան Յովհաննիսեան իր խօսքին մէջ շեշտեց կարեւորութիւնը կազմակերպուած հայութեան համախմբումին՝ հայրենիքի եւ անկախ ու ինքնուրոյն պետականութեան շուրջ:

www.aztarar.com
www.aztagdaily.com
www.yerakouyn.com

ՇԱԲԹՈՒԱՆ ԲԱՆԱՍՏԵՂԾՈՒԹԻՒՆԸ

Հայ ժողովուրդի լուսագոյն ու տաղանդաւոր մտաւորականներէն Մուշեղ Իշխանի սոյն գործը կը նուիրենք մեր ընթերցողներուն:

Աշխարհի Ցաւով

Միրտս կ'արինի՛ աշխարհի ցաւով,
Որքա՛ն տառապանք, Աստուած իմ, չորս դիս
Կեանքի դաշտերէն փչող ամէն հով
Հառաչ ու կսկիծ կը զարնէ դէմքիս:

Անմեղ զոհերու արինով եռուն
Հողը ոտքիս տակ կը մնայ միշտ թաց
Եւ նոր ոճիրներ, իմ շուրջն ու հեռուն,
Կը ծնին մարդիկ՝ արինով հարբած:

Գլուխս ինչպէ՞ս ես դնեմ բարձիս
Եւ ննջեմ խաղաղ, աներազ քունով,
Երբ անգին անքուն մօտիկ դրացիս
Կը հսկէ զաւկին հոգեվարքին քով:

Մուրի ու սովի կը դառնան աւար
Լոյսի պէս պայծառ մանուկներ սիրուն
Եւ ոտքի կոխան՝ հասկեր անհամար,
Աշխատաւորի քրտինքով օծուն:

Ես ինչպէ՞ս նստիմ խնճոյքի սեղան
Եւ ըմպեմ ուրախ վայելքի գինին,
Երբ որ կը խլեն մարդիկ անվարան
Որքի մը բերնէն պատառը հացին:

Աստուա՛ծ իմ, որքա՛ն անարդար վճիռ.
- Ես ինչպէ՞ս կրնամ քար դնել խղճիս...
Կեանքեր թեւաբեկ եւ շղթայակիր.
- Աշխարհի ցաւով հիւս՛նդ է հոգիս...

Մուշեղ ԻՇԽԱՆ